

溫州府 函 家 館

連居閣吟草

光緒壬午

桐廬龍巖  
黃采澗所製

余贊年題



温州市圖書館

索書號碼 75.44-4434

登記號碼 08186

共2冊

連居閣吟草 四卷

共 2 冊 存 2 冊 排架號 08048

光緒壬午  
立春後刊

序

嶺嶠值南交文明之藪山海鬱錯較勝中州其間物產  
類多瓌異而靈秀之氣間鍾於人不特蜚英騰茂之彥  
彪炳天壤卽巖棲谷汲往往發爲歌詠流芳青簡此固  
其地然哉夫亦德門華胄源遠流長始克有此也予於  
黃緝甫先生竊有羨焉先生禺山卓越士也少有文譽  
人嘗以偉器期之乃應邑郡試屢前矛卒不售遂寄意  
澗谷吟詠自娛然其所爲詩歌不事雕鏤自成腔拍殆  
超出尋常而非流俗所及者歟慨自世競詩豪囊爭錦

連居閣吟草  
貯妄摘華藻輒伉名流究之長城欲搗不是劉卿壇坫  
思登猶慙杜牧惟

先生空諸倚傍自寫襟期飯顆山頭少陵詞警桃榔庵  
裏坡老風高濡毫而翰藻霞蒸落紙而筆藹露灑詎僅  
月琢梅花之隲瓊雕苜蓿之盤已乎且夫金闕玉階之  
句無取乎幽芳而吟風弄月之辭必關乎至性

先生琳瑯滿帙美不勝言而凡頌祝臚歡鬱伊寫恨琴  
樽話別風雨懷思蘼晨月夕之豪吟佛地仙城之興託  
其思之飄然不羣者皆其性之脫然無累也

先生生平抱道樂善禔躬整肅爲士林模楷非區區以  
詩見而流風餘韻未嘗不可於詩而想見其爲人今哲  
嗣吉蕃手出

先生遺藁彙成一帙問序於予予以萍梗飄零詩律久  
曠恐畫龍不似無能爲役然登昌黎之室不忘鉅觀爰  
濡筆書其所知以爲嶺南韻事云

光緒八年壬午春三月朔昆陽陳應鎔拜序

序

粵東山水蜿蜒鬱積汪洋浩瀚大會於番禺之菱塘靈  
秀所鍾偉人迭出前明如李少偕黎美周梁未央諸公  
類皆俯視詞場莫敢抗手

國朝定鼎以來涵濡

教澤興起尤多潭山則有許揚雲蓼水則有車圖南官橋

則有韓緯五他如滄洲振譽於靈山鼎來樹望於員嶠

碩卿蜚聲於大石舉足與九谷翁山後先輝映非所謂

地靈而人傑者歟余家獅洋北每歲渡海展先壟於唐

此處為書寫或印刷的空白區域，包含一些模糊的印痕。

帽之峯躋其巔遐眺近矚其山鬱然森以秀其水激然清且鮮宜其代生達人以顯著於世而又意必有隱君子韜匿其間世不盡能知而余亦未獲見也同治丙寅家挺生館於其地歸爲余言有黃緝甫先生者蚤歲工詩文每一藝出輒驚其儕偶屢應童子試不售遂捨去伏處鄉閭養親課子以采山漁水爲樂間有所觸每吟咏以寄意多可傳者余心儀焉卽欲買舟往訪緣事未果繼迺獲交哲嗣吉蕃見其恂恂儒雅想見先生益切後余就館四方音問久疎今年秋吉蕃忽抱先生遺集囑序始知先生已歸道山嗚呼余之於先生心服神契而竟不獲一面耶以余之不文何足以序先生詩然以余之悅慕先生而不序其詩又何以彌不獲一面之憾也爰不辭而爲序其緣起至先生之詩精妙獨絕凡有目者皆共賞焉何俟余言茲不復贅

光緒八年歲在元默敦牂辜月增城鍾登鰲拜序

序

自古憂世之志樂天之懷士君子每達之於詩若園桃  
寫憂澗槩自樂聖人有取焉謂其足以感人心而扶世  
道也緝甫先生本其學養作為詩歌以自寫其憂樂之  
情其憂也為世而憂其樂也適性而樂脫然於名利而  
苦心皆忠厚所流甘趣由冲澹而得雅士襟懷以古自  
期而和平愷惻之音令人心佩非有合於聖人詩教之  
旨歟夫言為心聲讀詩者當相尋於其本元亮松菊之  
辭氣韻高品格高也少陵香稻諸詠意味厚性情厚也

先生志古人志成一家言卽其生平富不自驕貧能自適矜孤恤寡排難解紛曠視塵寰靜抒感喟其憂也固凡人所不及憂酌酒評花聽香讀書定靜生慧自鼓天倪其樂也亦凡人所不能樂故人皆愛其品而尤喜其詩與其品適相肖也後之讀其詩者誠憂世之憂用之以擔當世務樂己之樂存之以涵養性天又緝甫先生所欲成人之美者歟今哲嗣吉蕃於先生歿後以詩稿見示囑作一敘予以先生生平與予相知有素故辭不獲已然言指其實非阿所好有識者當不河漢斯言

光緒壬午秋月同里曹始昌謹序



題辭

不彫不斲見天真出口成文字字神試問唱酬風雅輩  
禹山東處有高人

有子猶能讀父書單詞隻字等璠璣就中三食神仙字  
着我多番辨魯魚

世愚弟重遊泮水六朝老人南海王鑑心拜題

征衫久受俗塵羈展誦瓊章觸逸思彭蠡昔曾懷渚鶴  
越江今喜獲珠驪人分先後追難及情契幽芳夢亦知  
回想荔灣吟詠日花間深愧執鞭遲

短章長句自怡融名士風流水石中放眼直空塵世界  
置身如坐月玲瓏胸懷卓犖皆蘇白氣象崢嶸有華嵩  
一樣柏梁臺上體詎教凡近味相同

愚弟洪都楊 鈞石卿甫拜題

辛巳秋月過采漁別墅得晤黃緝甫姻兄瀟灑出塵  
洗脫俗豔心許久之逾年過訪已返道山倍爲愴然  
伊令弟補之姻兄出遺藁相示大都言情之作居多  
直寫胸臆而不事獺祭我故欲步其後塵愧未能也  
率成數絕題贈以誌今昔之感云

一謝風流大小蘇不加雕飾是名儒後塵欲步緣何吝  
未識今吾似故吾

故人騎鶴已經年上界徵詩到謫仙最喜君謨能繼述  
梁公著作好流傳

詩學傳家業未荒烟花陶寫也尋常文章自古關心性  
留得人間齒頰香

心香一瓣記三秋笑語同登近水樓彈指光陰成往事  
白雲明月滿滄洲

忝姻生岡州任 沅拜稿

好靜門常掩耽幽脫俗塵推敲消歲月咳唾出清新  
石安閔地仁慈孝友身天南欽德望餘事作詩人

不到連居閣傷心後隔年偶來仰尊照幾度憶高賢附  
驥吾原老騎鯨君已仙愴懷覽遺集感舊一潸然

緝甫大兄余心交故友也去歲跨鶴德高望重遠邇  
咸推至詩之佳是其餘事耳拜讀遺集不覺淚下古  
道云亡令人思慕不已也鄰愚弟李俊林題并誌

集蘇學士句

詩來使我感舊事小字親書寄我詩聞道使君歸去後

莫忘衝雪送君時

苦學憐君太瘦生蠅頭寫字眼能明閔吟繞屋扶疎句  
無數新詩咳唾成

五百年間誰復在回頭樂事總成塵看君兩眼明如鏡  
空裏浮花夢裏身

草合平池憶惠連野花啼鳥亦欣然佳城一閉無窮事  
詩句明朝萬口傳

愚世姪鍾榮光百拜敬題

集司空詩品

連眉閣吟草 是齋 九  
大風捲水空潭瀉春拾物自富與古爲新載歌幽人載  
瞻載止若爲雄才坐中佳士生者百歲杖藜行歌妙造  
自然飲之太和吞吐大荒具備萬物真力彌滿生氣遠  
出冷然希音倘然適意富貴冷灰情性所至壯士拂劍  
高人惠巾喻彼行健山之嶙峋脫帽看詩脫巾獨步脫  
然畦封絕仁靈素真與不奪真取弗羈超心鍊冶如是  
得之花覆茆簷月明華屋玉壺買春其曰可讀天地與  
立明月前身誦之思之庶幾斯人

愚世姪東莞莫登蟾拜題

藐爾仙蹤一卷詩平生咳唾總珠璣旃檀焚後閒披讀  
如見朱霞白鶴姿

維護情深手澤餘遺編舊牘等璠璣世間多少承家者  
似此真能讀父書

緝甫封翁余舊東主也癸亥甲子兩載聚首相得甚  
歡其爲人也鶴骨仙姿清超拔俗脫然名利之中悠  
然畛域之外望而知爲金玉君子及讀連居閣吟草  
體類不一要皆清真雅正秀韻天成味其詩適肖其  
人至今猶恍惚與芳姿晤對時也夫潛德幽光久而

必發封翁寄志於詩令嗣吉蕃乃輯為成書公諸同  
好有子如此封翁為不亡矣通家弟凌鴻英題并誌

遠溯黃山谷名高著作郎木樨留一瓣君克紹餘香

香不誇羅綺君集中有遮莫盡誇羅綺香句超然契澹沖又有靜養心神契澹沖句

四時佳興在詎與俗人同

同功偏異響清想絕鷺塵春水桃花趣儼然黃道真

真從詞句見感我倍纏綿盥誦紅薇下依依見性天

天籟音全好堪為後輩師輜軒行采訪編入國風詞

姻姪梁綸冠敬題

撫覽遺篇觸緒新古風寥落見斯人交從乍識欣如故

詩不求工信有真花發連居琴酒地雨晴深巷詠觴晨

百年俯仰須行樂聞遂山陽感隔鄰

每緣天籟證襟期點綴風雲月露詞漢魏以還誰解詠

性情之外更無詩鶯花擊壤留題徧予嘗以邵子擊壤集贈君甚喜以詩

見竹石隨園位置奇集中有喜令嗣吉蕃購得隨園詩註歸之作平昔寄懷

應有在浮名絆我復何知

愚姊婿陳希獻拜題

我邑山川秀且奇人才彪炳盛於斯八桂蟬聯兩京兆

連居閣吟草題辭

庚辰科我邑同捷南宮者八人恰應邑學  
八桂儒林門額兩京兆謂梁檀翁橋梓  
天鍾靈秀非

諛詞匪特蜚英騰達多顯仕中有高人堪仰企化龍家

住萬山中

集中有若問詩人住何處  
化龍鄉在萬山中之句

日耽吟詠棄青紫

采山漁水樂陶然

君家有采  
漁別墅

弄月吟風俗慮蠲自然流

露寫懷抱渾厚和平本性天禔躬抱道尤堪羨施濟解

紛恆不倦士林模楷仰完人豈必區區以詩見流風自

足感鄉閭有子真能讀父書魯魚細辨裝成帙一編惠

我集連居

詩集號連  
居閣吟草

浣薇朗誦驚人句開卷神交恍相

遇後塵欲步愧未能私淑此心長嚮慕

緝甫先生子友吉蕃兄尊甫也予久耳先生名而未

獲一面丙戌秋吉蕃以此集見貽拜而讀之思清意

逸脫盡恆谿而温厚和平之旨溢於言外予雖與先

生未獲一面而開卷晤對益可想見其人令我思慕

之不能已也同鄉愚姪王國獻敬題并識

一代名吟繼晚唐驚人璀璨墨花香而今詩卷留天地

不負詩翁引興長

滿吐珠璣萬字芬浣同薇露讀韓文濟人生佛原多慧

唱玉應知思不羣

運斤陶陶直是爾

襟懷活潑抒天真隨地留題總出塵為想與酣時落筆

雕瓊鏤玉漱清新

家學淵源唱詠情仙才代出珠璣琳嶺南詩輩從頭溯

直邁前賢膾炙吟

世愚姪吳贊宣拜題

集古詩句

清文蔚且詠

謝朓新治北窗和何從事

與世亦殊倫

左

太冲詠史

晤言用自寫

阮籍詠懷

新聲妙入神

古詩十

九首

穆如灑清風

張華答何劭

飄如陌上塵

陶潛雜詩

思君如流水

徐幹雜詩

投弔往江濱

庾信和王少保詩

遙傷周處士

愚世姪譚懋禧拜題

穗垣兩夜訪黃吉蕃表弟於印岩書塾談次以尊人

緝甫舅父連居閣遺詩見眎囑題長句時舅父歸

道山有年盥誦篇章如親警效撫今追昔棖觸在

胸輒不自忖為賦長篇本巴人下里之詞寓華屋

山邱之感云爾

印岩夜雨他鄉客握手相逢話疇昔袖中重疊見遺編

...

...

展向燈前嗟動色君家有閣號連居別業蕭閒傍采漁

連居閣之西 卽采漁別墅 曾是若翁吟嘯地 若翁字 見史記 品題風月愛吾

廬溪山昔日稱全盛名流雅集談名勝當荆遺風有嗣

音 黃族遠祖有當荆先生者 翁山故里饒清與先生生 爲 國初詩人見邑志

性僻吟謳日日詩篇競唱酬朝向花山攜蠟屐暮從黃

木趁歸舟一門共羨文章伯筆陣縱橫看勁敵青草池

塘覓句時紫荊籬落留題迹 先生性友愛集中與 羣從兄弟唱和最多 世事

歡娛那可長一朝眼底閱滄桑鄉園斗米傳張角異域

兵塵煽夜郎 咸豐甲寅後迭遭 紅匪暎夷之亂 先生籌策親團練 設龍 山局

襄辦團練 厥功甚偉 談笑從容靖奇變投筆誰知壯士心枕戈共

識詩人面詩人老去不堪論長揖歸來處士身賸有一

篇鴻雪迹朗吟字字見精神嗟余總角來甥舍每憶歡

顏感情話問字常翻案上書蹴毬偶戲池邊榭齊檐夏

果垂垂熟花事闌珊遍林屋攀枝小摘許分甘繞砌尋

香輒盈掬 采漁水閣有羊桃一株甚美兒時游戲其 下舅父輒摘果啖余亦時以園花見惠 悄

覓園丁喚阿初阿初爛醉作坳胡 園丁阿初年六十餘 嗜酒天真爛漫慣作

坳胡嚇人按史坳胡爲前五代時名將威 震殊俗江淮間每呼其姓字以止兒啼 有時恰值門

前睡屏息潛過足疾趨往事回頭如夢寐兒時瑣屑偏



能記今夕相看見二毛流光荏苒容顏異渭陽遙望隔  
前塵世故推移百感新同輩性情今見汝西州憑弔古  
何人遭逢且莫傷浮沒覆兩翻雲何用說世上風波無  
處無悲歌徒使肝腸絕永夜沈沈思黯黯燈花無語落  
檐前風流往日銷沈盡檢點殘編仗後賢大有賞音來  
異代忍教遺憾在重泉傳家著作光梨棗懷古心情付  
綵箋拈毫贈句吾何惜才盡枯腸恣搜索調苦人間聽  
者稀還君此卷三歎息

陳景周頓首謹題

逸士騎鯨去長留一卷詩氣涵烟岫古筆挾海門奇好  
句能醫俗清言最耐思此編堪壽世贈我勝珠璣

愚世姪曹始昌拜題

玉粹金貞品無偶南天江夏推吾舅聰明渾厚和且平  
愷悌慈祥孝而友笑談風月老烟霞望重粉榆仰山斗  
勃然興到詩狂吟輒爾機隨筆頻走離奇峻峭神鬼驚  
勁快豪雄蛟龍吼萬柄天然出水芙蓉千絲婀娜隨風柳  
不事雕飾見天真令人心目空塵垢遺編徒讀淚交并  
今我空慨腸迴九暢談詩興記連居不堪往事重回首

卅年故我尙依然七字後塵羞步否索句且效西施顰  
搜吟聊獻無塩醜留題集後劣無文應笑金貂尾續狗

外甥陳啟東頓首拜題

何事文章祇潤身見公詩格見公人家家聞道稱生佛  
吟到拈花一笑春

當蒞先公邑乘光詩名羣舉化龍鄉笑將詩是吾家事  
世祭從今臘酒香

賽神曾詠牡丹時擁護花王得句奇記取風人聲價倍  
嶺南又采狀元詩

解事名言語不刊懷人厚意思無端高歌擊壤皆天趣  
留作生平行狀看

族姪孫汝器頓首謹題

進居... 是...  
教授儒林郎候選州同封奉政大夫黃君墓誌銘

南海梁金韜撰

君諱禧本名在熙字恩縣別字緝甫姓黃氏番禺化龍鄉人始祖粵南宋宣議郎繇南雄徙番禺君其二十一世也幼岐嶷誦讀踰常童及長有文譽師友咸器重之應童子試府縣屢前列卒不獲一青其衿自年三十八奉本生考諱後遂絕意進取迺援例繇國學生候選布政司都事晉州同階儒林郎請封父母母年且老孝養如所生友昆弟又篤其愛逮年五十叔季弟相繼去世

君慟如失手足數晨夕者惟仲弟與其時敘天倫樂事復念諸子姪當訓誨延師課之暇則偕諸父老話農桑或哦詩自娛而已君爲人厚重簡默體癯削退然如不勝衣而見義勇爲不色倦甲寅紅賊亂後襄辦鄉團鋤莠植苗輿論惟允處族事靡弗帖服爲世交擇嗣調護合宜貧屋圯於風爲其葺故人歿貧如洗其孤賴以卹客遊粵失所給川資歸無似續藉耐不祀者得祀它若貧嫠代旌窮殯助費度歲餽粟矜寒施衣以及脩造橋路諸事苟力可及靡不爲之其嗜義樂善蓋天性也然

君用財雖豐於人而自奉甚約每爲天下愛惜物力惟於先人宅兆雖鬻產資費無吝色暮年以先世柩多在殯深以窀穸未安爲憾迺窮歷白雲諸山跋涉過勞輿疾歸里病遂不起彌留際屬子姪以讀書立品罔越矩矱爲勛歿四日殮面如生成謂德脩所至葬日攀輻酌酒者盈道嗚呼可謂篤厚君子人矣君生嘉慶甲戌五月二十六日終光緒辛巳十月二十四日年六十有八曾祖翰翽國學生贈儒林郎祖堂鐘國學生贈奉直大夫父炳輝贈奉政大夫母節孝江太宜人本生父南都

察院都事加一級母謝太宜人。生君兄弟四人，君以長子繼長房焉。配陳宜人，繼配張宜人，俱先君卒不附側室。徐宜人五男二女，成立者男二女一。維杰同知銜光祿寺署正，加三級錫良按察司經歷，鈞封君如其官。女歸同縣翰林院待詔梁毓芳，其外孫梁丕鈺以余嘗銘待詔君墓，攜狀重謁余，銘余以翁壻皆彬彬善人，可嘉也。爰不辭君著有連居閣吟草四卷、采漁試帖詞鈔各一卷，生平愛誦邵堯夫詩，故頗有其體。其墓在邑之丫髻山，正面岡庚申嚮厥嗣重繭迺獲僉歎吉壤云。銘曰：行匪奇善，則爲川匪流澤。亦施諺云：福人留福地，吾見爾子孫是宜。

附記

連居閣吟草付梓告成後，先大父固以德聞海內外人士咸仰重之。嘗由兩廣督臣李翰章專摺奏請。

旌表孝友義行，光緒拾七年二月初三日奉

旨准旌孝友義行，崇祀孝弟祠，給帑建坊。光緒三十一年以外孫梁丕鈺

覃恩晉贈光祿大夫頭戴頂戴出使美秘古墨國大臣

內閣侍讀學士光緒三十三年以子維杰

誥贈朝議大夫選用知府此均未詳于墓誌者也

孫翹芝謹誌

連居閣吟草卷一

番禺黃 禧緝甫著

男 維杰吉蕃編校

元日試筆



筆正原心正揮毫自有神陽和隨腕轉萬首寫詩新

讀書

子雲亭館自幽居壁上瑤琴架上書法史法言文奧妙

紛紛貽我味三餘

村樓晚望

輕風微雨豔陽天家住青山綠水邊讀罷登樓看春色

連眉閣吟草 卷一  
柳枝搖曳畫欄前

案上水仙

不偕百卉鬪便娟雪質冰膚態自然猶記海東聽雅操  
渾疑洛水見神仙凌波步遠塵埃外佩玉聲銷佛座前  
可惜騎鯨驛客去獨留清侶伴詩編

春日遊翠林園

霞緋雪絳豔亭臺十二闌邊爛漫開滿路嫣紅看不盡  
幾枝桃又壓牆來

放鶴

望汝雲霄羽翮開好隨仙鳳入瑤臺妻梅究少林和靖  
遮莫依人引子來

阮步兵籍

越禮志猖狂非關鑿未洞實藐世上人長嘯故違眾

嵇中散康

性如龍矯矯不與俗浮沉所見而去者終難喻此心

劉參軍伶

道德常內充情欲莫能眩頌酒雖自豪猶非樂荒宴

阮始平咸

佳器有仲容秀發自性始郭奕太原來見之欽不已

向常侍秀

洛邑亦偶鍛山陽曾灌園祇隨嵇呂輩霞舉共軒軒

初夏即事

碧紗窗畔有餘香風捲飛花度草塘不讓江南風景好

紅蓮翠芰滿江鄉

荔枝灣畔荔枝紅引得遊船組織同最好磯頭風淡蕩

漁娃打槳綠波中

途中見柳

愛爾多情甚臨風學舞腰青帘沽酒路紅板賣魚橋拂

水枝何弱搖秋態愈嬌誰家來此別折去短長條

書齋散步

讀罷楊箴九善言閒閒負手向東園池塘風靜斜陽暮

停歇書聲寂不喧

秋初熱極得雨

萬疊濃雲接地陰乍來驟雨響秋林葛衣一著涼如洗

不似前宵熱滿襟

園林秋景



運斤閣吟草 卷一  
三  
亭臺無限好秋色滿園林曉露侵蓮井西風拂柳陰晚  
霞描畫譜鳴鶴弄仙音高向層樓望飄飄拓素心

### 棉花歌

山南種禾苗滿場山北種棉花滿岡棉花差比禾花潔  
紛紛如雪冒成行棉花又比禾花麗白雲遍隴呈光芒  
憶昔三月下棉種一月三薈深酌量望棉實結棉未結  
終日縈繞心皇皇君不見山翁之妻攜鍤畚奔走湟汗  
山之旁及秋棉實綻四裂葉葉蒼翠花生黃此時家室  
亦忙甚牽裾穉子頻攜筐藜藿載擔侵晨露竹甬盈舟

趁夕陽純乎麗密碾牖下疊疊輕如雲錦張收從農人  
有且旨紡自紅女精且良寄語市城溫飽地遮莫盡誇  
羅綺香

### 酒後卽事

酒後尋詩句茶香手自煎呼僮掃石榻卧對百花妍

### 江村別墅訪羅柱石廣文

一到江村笑口開幽窗煮酒鬪詩才癡心欲把長途縮  
夜夜微吟踏月來

淡烟疎雨儼山家一抹清香幾樹花分付園丁須護惜

連居閣吟草 卷一  
四  
雅人原不重繁華

江村別墅

層樓高聳接雲巔恍惚瀛壺小洞天我亦願登宏景閣  
暢談樽酒結詩仙

窈窕窗櫺八面開垂楊深處起樓臺宛然繪出倪迂畫  
點綴烟雲綠一堆

海雲寺禪房題壁

几淨窗明處留香漫捲簾琴書誰作伴花影覆幽檐

雨夜聽叔父太元廣文彈琴二首

存一

夜靜心如水天機一片清偶然聲跌宕都覺韻和平下  
指生波活調弦帶雨鳴誰參流水意同契伯牙情

秋日偕從兄卧廬仲儒買舟赴省夜泊雞翼城次

仲儒韻

江天如洗晚霞晴桂棹輕移浪不驚未問篙工泊何處  
開篷忽見五羊城

木蘭船擁越江頭雞翼城邊夜不收最好月明絃管動  
引人低唱小鶯喉

越臺懷古

獨訪遺臺思黯然霸才無兩亦雲煙若還爭鹿逾添恨  
漢帝陵荒不記年

過虞仲翔故宅

畢竟君王解愛才蠻鄉任爾杖筇來一篇鸚鵡何人賦  
博得荒邱長綠苔

花藥洲

花藥芬馥繞翠洲長生共信此堪求鍊丹方士今何在  
可是攀髯闔苑遊

素馨斜

舞扇歌衫委野塵芳魂幻出萬花春而今屋瓦鱗鱗處  
誰識泉臺認玉人

別離曲

心所難忘者家情所難堪者別人當獨在異鄉最怕每  
逢佳節

銜蘆暮雁驚心咽草秋蟲觸耳里懷故國三千唱一聲  
河滿子

立冬

雪花微糝白梅香逗漏春光晝漸長閒數年華如逝水

飛葭時節又生陽

鸚鵡

自離芳草寄籠樊笑話居然做眾喧巧合主人牙慧利  
累身猶恐爲多言

冬雪有感

一天皎皎寒飛雪一地寒風聲切切開簾乍見珠點綴  
疑是仙人下瓊屑霏霏遍布野田畷載塗忽似風花瞥  
百物驚觸皆栗冽水邊鸛雀欲鳴埵瑟縮聲震常若噎  
檐下鸚鵡欲調舌珠喉冷澀音若滅塞草驢馬欲噬齧

霜蹶凍圻懼摧折蚯蚓注土深蟠結蠹蝓入壁密尋穴  
籬下凝壓冬筍節渚上冷濯青蒲潔浣花谿並冰泉咽  
種菜塘兼霜鏡澈憫彼園丁日提挈手膚皸瘃足圻裂  
憫彼蓬篳戶窮子茅屋寒沍斷竹篾孰將一室鑪炭藝  
送與貧家炙手熱孰將一笥袍襖設免使牛衣人杌隤  
我方圍鑪家人列白石鼎煮清酒啜甕頭數瓊香漸烈  
又感貧士冷似鐵門戶扃閉故人別擁衾兀坐念不輟  
願祝白雪變作黃金埒貺與天下寒峻盡怡悅

新春賽神竹枝詞十首

存四

摳衣齊進五花堂曲彙闌邊列兩行新摺舊縫皆錦繡  
淡梳中有本來粧

弓鞋三寸踏春行步上經堂聽梵聲禮罷如來私自禱  
願從天賜一身輕

紅棚綠架障金泥恍惚雲霞處處迷大塊文章觀不盡  
燈花紅燦錦花齊

錦花爭比洛陽街鬪鳳紅裙白燕釵況有繁華春色好  
無邊煙景付吟懷

二月二日偕從兄卧廬韞玉謁南海神祠飲波羅

江上卽席次韞玉韻

巍峩宮闕壯炎荒我輩來遊一葦航璀璨棖題疑鳳翽  
奔騰滄海覺龍忙摳衣石徑登雲迴極目山亭浴日涼  
不減廣寒探桂府袖頭濃挹野花香

筆

陣列管城子鋒鋟掃萬軍詞場爭戰苦不可日離君

硯

硯作荷  
葉形

一片端州石渾如出水荷寒儒無舊業耕稼此中多

仲夏食荔

敲出詩人字汁漿輕紅一掬笑同嘗箇中滋味如書味

沁徹心脾夢亦香

宴做紅雲五月天榴花時節共爭妍嶺南物產原多美

怪底坡公願謫遷

七夕示女兒

家家粉席爭妍處處花瓜競美我循淡薄家風祇薦一

盃香水

良夜良緣如此一年一度非輕夜乞黃姑送巧恐他無

此閒情

月夜看花

吟壇詩酒接香壇觸動閒情帶月看最愛淡烟籠不住

任人花罅辨紅欄

甲寅感事 是年紅匪煽亂

荏苒煽燄勢縱橫蟻聚蠶屯列旆旌十字路頭逃難者

劇憐深夜亦偕行 時眷屬俱避賊羅山余妹婿羅海山家

風聲鶴唳遍鄉閭老幼奔馳靡定居 時又之南山鄔可亭封翁家余仲弟

補之娶封翁女 覲面鄉鄰時偶語不知稔莠幾時除

蛛網

運居閣吟草 卷一  
終朝踴躍冒庭除欲使張羅總不虛告爾智謀精密輩  
須將一隙爲留餘

燈蛾

不顧容身險與安火花貪作菜花餐莫言炎熱趨無礙  
一困熬煎解脫難

蛙鬪

疾威全不念同聲祇若仇家恨不平方寸讓開原自樂  
問君何事日紛爭

螳附

趨向盤盂膩慕脂肌膚難免熱湯危倘非心爲膏腴戀  
豈致焚身禍不知

龍山晚望次家作甫茂才原韻

蒲帆幅幅映山堂湛碧浮空趁夕陽一樣虎門潮上水  
悶中遙對倍蒼涼  
松影榕陰景色清林梢烟外暮潮平最妨風雨難成寐  
驚聽千溇萬疊聲

眉塘納涼

空曠無遮礙閒來納晚涼竹松交秀影天水共清光明

月照山徑香風過野塘黃灣東望處烟外一帆揚

夏日書齋遣興

避暑亭中一枕敲煙霞以外漫縈思五銖衣薄簷風透  
恍對瓊窗雪滿枝

數月光陰駒隙過未曾花底罷吟哦自從荔紫榴紅後  
檢點詩囊漸覺多

過夏涼居贈李萬竹明經

卜築池邊不染塵斜陽芳草一天春竹林已長成龍幹  
萍沼初鋪睡鴨茵老去愛才知倍切年來添興孰爲鄰

龍山自昔稱詩社月下攜詩許問津

輓從兄玉臺

飄然形影入禪關駕鶴西歸竟不還

玉臺曾繪  
逃禪小影

四十年

來原幻境三千界外謝塵寰不堪儻豆重回首尙憶吹  
壘共解顏芳草詠吟今已矣幾回春夢淚痕斑

花船入泊偕李萬竹冠羣家達江作甫晚步賞花

次萬竹韻

紛紛人不辨雲泥羣喜花船泊小溪爭說瓣香迷夢蝶  
豈無心鏡照靈犀蕊珠浥露姿同媚藻采凌雲價未低



連唐閣吟草 卷一  
翹盼廣寒宮樹畔敢忘攀桂覓丹梯

晤潘堯臣刺史

幾年一面又西東彩筆斑斕氣鬱葱今日空嗟人似雁

獨於巢裏羨摩空

堯臣時將赴任

羨君才調信高人鵬路風雲壯志伸說與琴堂須努力  
蒼生情事貴身親

晚晴偕達江登花山岡

碧雲千樹綠千林惹得吾人顧盼深莫忘花山山畔路  
夕烟斜處共幽尋

山峯奇峭孰攀躋高躡層巔杖倚藜沿路野花紛莫識  
祇隨人影過橋西

初夏偶成

忽訝當頭火傘張花間侍婢說炎涼渠言梅熟初添暑  
尙有炎蒸一季長

家園閒詠

家園半畝足生涯朱橘黃柑味最佳何必官厨珍錯列  
及時蔬果且安排

過李杏苑養芝軒

連眉閣吟草 卷一  
瑤草瓊枝景物新此中頤養倍精神無花幻結仙人果  
小苑能安逸老身聞說芝英增異采分明松壽證前因  
水雲村裏烟霞老訪到溪橋願結鄰

讀謝照山孝廉寸岳樓吟草有感

吟草編成集因顏寸岳樓聲名驚四海筆力壯千秋惜  
未瀛洲步欣存片羽留空勞期望意慚負此躬修

讀寸岳樓詩有懷何亨齋明經師

回首談經日春風次第吹青燈勤誦讀絳帳喜追隨訓  
迪垂模範欽承在表儀儒宗聯唱和相對兩名師

集中  
多同

亨齋師唱

和之作

遇故人黎次臯孝廉

同戰名場記昔年相逢仍是未華顛  
賁南久別還相認邂逅蕭齋又拍肩

蕭齋風景最清幽花落庭閒好唱酬  
竟日劇談無俗事更繙書史白同浮

元日赴飲龍山卽席步李萬竹韻二首

存一

昨夜清樽餞臘神今朝豪興猝添新  
況當一席龍山會敢靳餘歡負故人

春曉

桃李爭開錦繡天  
曉窗微罩綠楊烟  
已聽深巷花聲過  
猶擁衾衾自在眠

舟泊珠江

繁華世界粵江中  
簫管樓船鬪晚風  
最愛柳波涌畔景  
淡烟含綠夕陽紅

岸花明映畫船燈  
好景誰人繪剡藤  
我欲奚囊收妙句  
詩心如水氣俱澄

粵秀山妙巖觀題壁

余少日隨叔父太元廣文從兄仲儒明經讀書於此

戲題長句粉牆東  
題罷長吟氣愈雄  
若問詩人住何處  
化龍鄉在萬山中

贈洪閒笙茂才

是年館余鄉

絳幃來設曲江濱  
道範温温信可親  
黃綺自知爲隱士  
洪崖原本是仙人  
前山花影添光采  
隔嶺松聲接比鄰  
一樣舞雩歌詠地  
春風纔到物皆新

百樹山房訪李何衢都戎追話舊事感而有賦

人生遐福世罕有  
醞釀太和垂裕後  
階下芝蘭竝帶開  
陪侍青蓮探二酉

何衢是年聘李天碩茂才授兩郎讀於此

生長東溪東海

邊霽雲英氣正無偏文場昔日前矛列孫陽不遇徒潛

然遂投文筆習戎武赤刀奔電力如虎年公麾下岳公

門三箭鵠心響官鼓斯時意氣俱英雄拔幟登壇旦夕

中猶憶秋風芸館夜燈花曾為兩人紅何衢談及進席時偕同案李杏

村千戎宿余館同候覆試青衿未改書生面說古談今心尚健滿腹

經綸更善詩詩章不讓王維鍊不求仕進隱園林百樹

山房萬木深無論春花秋月夜但逢興會便高吟

讀小倉山房詩註謝靜山先生著版藏梅花詩屋

梅花詩屋一詩人萬卷琳琅滿架陳為愛隨園篇什好

註成應許作功臣

詳明字句費心研嘉惠同人目了然即證袁門諸弟子

也應頰首拜風前

偕閒笙過李杏苑養芝園采荷次閒笙韻

徙倚池邊共納涼荷盤偏愛出泥香露珠采采終成幻

合浦何須問孟嘗

紅蓮池接白蓮池無限輕盈綽約姿濃淡粧成嬌欲語

累儂花下立多時

隔山賞荔赴李冠羣把戎約四首存二

紅雲曾宴荔枝灣佳味于今又隔山灼灼繁星垂萬顆  
興來林下頓開顏

一里香風樹百株滿山紅遍顏虬珠主人邀客相攜手  
飽嗽瓊漿坐路隅

過洪間笙館不遇

銅琶同唱大江東別緒時時繫寸衷不覺鱸堂圖史畔  
數株桃杏又添紅

搔首庭前繫我思暮雲春樹悵何之情懷未已添吟興  
歸詠猶如晤對時

有感次閒笙韻

小隱園林又十年人間滄海變桑田功名好夢都塵俗  
豈似洪崖笑拍肩

涵養功深夢不驚人情世態總分明山中學作烟霞叟  
不共浮生競薄名

和韞玉詠蓮原韻

不論紅蓮與白蓮花花葉葉水中仙納涼幸有黃扉父  
玩賞應來白樂天

並謂閒笙

撐艇小娃來絡繹尋芳君子愛

纏綿相期世上緇衣客好向清香結靜緣

運居閣吟草 卷一  
立秋前三日大雨得句

未到迎秋日先來雨洗秋況當秋信至秋色更盈眸

秋夜與李際堂家勉齋韞玉過邀洪間笙小敘不

遇屢往皆未返因步月而歸

訪客空勞幾次行月涼如水浸階明沉吟卻立梅窗畔  
共覓歸途白露橫

蕙芳樓秋夜聞笛對從弟綉裳作

歲序隨流水涼風又報秋青燈憐瘦影白髮漸侵頭竹

密蛩鳴砌桐疎月上樓誰家吹玉笛應觸夜心愁

綉裳有夜

深人靜聞  
之生愁語

過羅柱石別墅

羨君花木足平章綠樹濃陰午夢長泉石有緣容我到

琴書無日不相將文壇藻采爭溫李秋水空靈悟老莊

更喜小星房畔耀衾綢時襲桂花香

柱石時  
新納寵

叔和芳躅傍山居種竹栽花樂有餘百尺樓臺供眺望

一編詞賦慣相於迴廊曲折神仙島祕室深藏逸老書

回首緇帷培植日步趨曾竝沐吹噓

謂令堂兄  
崑山師

重提往事思悽然百感難忘記筆顛浮世勲名成遠夢

滿囊詩句證前緣無才詎敢談千古有骨徒能學半仙  
安得寸懷除俗繫道心無礙契魚鳶

德輝熒映伍喬星又應弧南享大齡似惜燈前頭易白  
已知爐裏火添青評花榻畔茶烟滿玩月池邊芟葉馨  
正是暢吟歡詠處祝君杯酒莫須停

李杏苑邀賞晚菊次壁間韻二首

存一

繞籬疑吐令君香錯落霜中不怯霜寂寞但教存素質  
繁華何事競紅妝故人共喜寒英豔知己誰能晚節光  
把酒對花彭澤宰多君香癖更清狂

和李萬竹六十五得子原韻五首

存一

花甲重新景運熙天鍾佳瑞誕麟兒奇雛出卵應殊眾  
老蚌生珠不厭遲酌我舊醅猶綠蟻羨茲英物度黃驪  
而今得遂蘇瓌願蟾桂香攀可豫期

蒙師羅崑山先生年度七旬康強猶昔書此奉寄  
聞說先生較昔強髻齡六載立門牆功名身外烟雲散  
師弟情中日月長步不持筇知勁健人堪比玉倍堅剛  
遙思白鹿峯頭宅重許黃銖叩講堂

醫士楊三楷先生客余鄉十餘載今始言旋賦此

誌別

飛鴻回憶雪花天轉瞬光陰二十年杯酒贈言因惜別  
烟霞棲託總隨緣濟人樂捨韓康藥守己廉如高允賢  
從此杏林花似海還期珍重董家仙

贈陳秩卿茂才

是年館余鄉卽  
洪開筮舊席

先生久已擅才名軍掃千人筆陣橫不減世南行祕錄  
坡公題到亦心傾

兩地春風同大化良朋聚首覺緣慳洪崖去後陳搏到  
從古高人遞往還

晚望

瞥見紅雲又翠雲夕陽籠罩色氤氳天公憫我才枯甚  
故貺千章錦繡文

偕秩卿石隄步月卽次其韻

潮長帶風來炎威乍消歇斜傾銀漢星倒瀉金波月嘉  
穎豁塵埃老榕光發越尋詩且漫行何必去倉猝

酒後吟

公瑾醅醪味可尋撫松斜倚綠窗陰評花剛見花開口  
拈韻還期韻愜心五月吉辰翻荔譜

余性嗜荔恰  
於五月生辰

數聲



流水契桐琴舊醅數瓊顏醅後更課兒童學誦吟時兩兒俱

幼學

鄔可亭丈邀遊鼎湖余不暇往賦此奉答

向禽婚嫁事匆匆

是年長女出閣

畏俗偏難出俗中惟願登山

臨水會年年遊興與今同

秋七月同人約遊鼎湖李子坪茂才願為先導賦

寄二首

存一

先生風雅名山主煮酒西巖笑語陪愧我塵蹤牽累大  
蔬樽無自侍君開

冬月望日余堵梁堯階初至酒間喜賦

快婿才人萃一堂

時陳秋卿同酌

雪花筵畔頓增光巡簷恰好

窗梅綻助我聯歡瓊數行

開筵倒屣迓高軒月滿花間酒滿樽且喜庭前佳士集  
歡呼狂飲不須論

和僚婿鄧子宜見贈之作並步原韻

時夷人煽亂子宜攜家避

舍下

陣陣蠻煙擁鸛鵝無端入境亂操戈君家卻有無疆福  
婦子依然樂寤歌

連居閣吟草 卷一  
十萬人家靡定居驚弓飛鳥各紛如鄉間地僻差能免  
城市于今半屬虛

### 哭韞玉

唱和當年仿柏梁薛綫同擘讀書堂十聯佳句纔酬贈  
一枕華胥竟渺茫烏養庭前期乃弟鴻篇窗下付文郎  
最憐未畢循陔願空向蘭詩悵補亡

韞玉生  
母尙存

### 自題采漁別墅

小苑門迎斗柄東四山環繞樹龍葱重簾半捲邀明月  
設榻當窗引好風賸有詩書還教子未豐毛羽忝爲翁

浮生漸向塵中老起舞聞雞氣尙雄

白玉蘭花傍水開波光林影盪樓臺新荷夾岸遮魚戲  
古樹當門揖客來垂釣有時稱老健吟詩無地不徘徊  
元章石畔坡仙宅也學揮毫逞薄才

### 涵清閣

水畔窗開豁靜襟羊腸徑入曲深深應嫌世態趨炎甚  
獨倚層樓傍綠陰

涵清樓下浣花居斗室能容我讀書若使勞形羈薄宦  
半生何處愛吾廬

高竹成林綠蔽天  
午陰無暑惹鳴蟬  
看花對酒西窗下  
醉裏渾疑洞入仙

荷花臨水竹連棚  
荷蓋濃陰午夢清  
窗外風聲簾外雨  
亭前睡起不分明

登采漁樓雜詠

嵯峨棟宇接霞明  
盪我胸懷景倍清  
遍覽烟雲渾若畫  
近山高聳遠山平

又從水畔起平臺  
望裏青山一帶開  
雨後風涼憑眺覽  
農人沿道笑聲回

簷前高柳綠絲絲  
細雨和風任轉移  
最好渡頭烟半鎖

桃花爛漫點輕脂  
涵清閣上從伯文巖茂才書有楊柳  
綠搖樓外雨桃花紅點渡頭烟之聯

荷池如鏡水如油  
欲納微涼又下樓  
可奈矮簷春雨夜  
百端愁緒惱心頭

連居閣吟草卷一終

連居閣吟草卷二

番禺黃 禧緝甫著 男 維杰吉蕃編校

過員岡有懷崔睦堂廣文師

指點前溪道路通異鄉翻與故鄉同  
崔邠師範凌雲去 尙有黃桓到此中

人殊今昔老朱顏四十年來鬢已斑  
重向岡邊看風景 雲烟依舊擁螺鬟

深夜偶成

月落參橫夜正深隔簾無語樹聲沈  
銀釭一點花雙穗

通唐詩集卷二  
觸起詩情次第吟

吟窗雜詠八首

茶

年來心緒半憂煎，熱惱塵根苦自纏。  
賴有清涼山上茗，詩心能洗俗心捐。

酒

樽中有酒輒忘憂，酒德而今尙憶劉。  
願結提壺攜榼侶，年年長作醉鄉遊。

香

鴨鑪幾縷裊書幃，著意尋來味轉稀。  
古字篆成誰領取，沉檀清徹道心微。

燈

一穗銀花著色鮮，蕭齋書味記年年。  
照人休說渾無謂，珍重還將伴枕邊。

帳

薄薄波痕四面斜，閒將枕簟託籠紗。  
纖塵隔斷心彌靜，蚊語蠅聲漫自譁。

簾

連居閣吟草 卷二  
水晶紋碎漾波光珠影低垂曳地長月下重重長不捲  
鴨鑪深夜爲留香

闌干

紅欄十二繞紅廊花氣穿櫺暗送香騷客不來天欲暮  
此間容易動迴腸

書架

左右牙籤次第分聖經賢傳古今文枕錢枕貨紛紛競  
滿貯琳瑯孰似君

九月賦旗省墓洪間笙訪余舟次值余登山留詩

而去約下午復來後竟不果因次其韻

聞說回車喜氣盈相逢慰我舊離情將添紅燭爲行酒  
早摘青蔬待煮羹南浦贈言原有約束郊望駕悄無聲  
料能覲面翻成恨如此緣慳劇不平

南園謁十先生像因賦

南園雅詠接風騷後哲前修句並豪更有黃

泰區海目作

龍腹有明一代粵才高

李杏苑招集養芝軒餐菊

芝軒人繼采芝翁好客栽花逸士同邀得客來花滿座

花團客聚樂何窮

今朝纔到養芝軒人自軒渠花自繁卻羨主人深愛客  
挈壺頻往杏花村

采漁樓晚眺

斜陽落未盡照我獨登樓老樹零方淡殘烟去復留鴉  
窺檐處集鶴向戶邊投林鳥時相狎喧囂境亦幽

地堂園有優伶一部宴會無虛日時余居采漁聞

之對綉裳戲作

香風數載濃於酒式歌且舞酌大斗紛紛絲管過雲來

此曲不殊天上有自從風月共流連舊曲新聲次第宣  
金裳少婦紅牙板羽衣三疊如神仙憶昔園中事操作  
十畝寬閒誰領畧綠松簷外綠蔬生時往時還惟野鶴  
孰知今日樂偏長翻借山家作戲場引動山中采藥叟  
拍肩都作笑聲揚笑聲遙聽大羅天月夜宏開玳瑁筵  
最是孟嘗能好客招邀珠履自年年

元旦遣興

又見桃符冒綵絲千門萬戶樂相隨銜珠丹鳳迎年入  
運柄蒼龍順序移佳節銀毫書寶篆華筵春酒助新詩

樽前重說高堂興徙倚餘暉念昔時

示諸子

家庭無恙自安閒最好攻書靜掩關烏足莫言繩可繫  
青春容易老朱顏

十載宜思萬里功曹倉孔壁合研窮從今黃卷青燈下  
一點靈犀照莫蒙

謝陳秩卿扇

翠輦紅輕六角柔中藏佳句寫銀鈎千金一字誠堪重  
況有烟雲勝十洲

揮毫摹倣換鶯經情重如山五內銘愧乏瓊瑤酬莫遂  
漫將詩句答君聽

春燕

相隨春風來笑汝知時節昔依雲水鄉曾否冒霜雪今  
尋舊主歸思向新巢結飛下啄香泥經營心倍切

秋雁

嘹唳一聲秋忽驚漁笛晚數行列成文萬里去復返度  
寒影橫斜入雲氣深穩夜來動客愁聞斯心更遠

秋日偕戴尺山凌韶階暨從姪篤生景來訪李杏



苑不遇而回中途相值同回養芝軒賞菊

踏秋秋曉趁清涼一路遙聞刈稻香惟有菊中人不見  
空教園外賞餘芳

相睽難覓忽相親邂逅偕臧笑語真把袂同循三徑入  
轉通幽處倍怡神

神交真箇比蘭芝臭味相同氣共滋若使瓊軒今未晤  
那能花下慰相思

年來方寸付詩章偶逐芳蹤步曲廊行到小門花砌近  
始知園圃更清香

重陽後三日買舟赴省將掃墓三台嶺舟中有作  
獅海波平蜃氣空片帆高掛趁秋風數叢沙草荒溪外  
萬仞山城夕照中峯頂共誰尋落雁泥痕幾度認飛鴻  
明朝掃墓三台嶺飽看楓林樹樹紅

登三台嶺次黎伯吹姊丈原韻二首

肩輿遙望白雲來大小峯巒四面開明秀漸多奇險少  
分明靈氣萃三台

何年星宿降精來山翠延綿畫不開百仞飛霞雖峻極  
也輸靈秀滿三台

花山第一泉

澈若玻璃潔若晶石欄流出液霏瓊若將妃子華清比  
恐遜斯泉百倍清

新春賽神余齋前盛設牡丹

寶露慈雲蔭比鄰曇花光映洛花新蜂媒蝶使羣相逐  
擁護花王倍有神

無限遊蹤競賞花爭傳花好屬吾家生花未有青蓮筆  
慙愧花前寫物華

過官橋遇白山

髯翁年來謝塵境閉室覽古忘園窺東壁圖籍西壁酒  
頤養無藉商山芝自與鶴閒臨水久曠拓胸懷忘萬有  
幽居門內謝塵寰豈管落花人別後忽於市上酒家眠  
邂逅逢君話舊緣開樽細問年來事驚疑惆悵更纏綿  
勸我加餐復努力直上銀臺輔君國蓬萊仙葩芬以芳  
毋徒古砌眷秋色乍聞斯語倍驚惶逝水年華感鬢霜  
豈知組綬添人苦須識山林引興長君不見弓藏鳥盡  
時蒼烟埋沒徒荒陂何如美酒花下絕塵沅日與騷客  
援筆題詠陳新詩

崔敬坡明經以詩見贈次韻奉答

庸才久已困家鄉

敬坡贈有先生  
風節重家鄉句

縱目徒窺選佛場愧

我蹉跎無實學喜君炳耀有文光  
堂階講禮趨蹌熟頭角驚人器象昂  
一曲高歌原寡和偏吟拙句答瑤章

贈王光表

萬卷摻羅細品評言深旨遠見專精  
詩書豈爲科名讀高士從來避俗情

看書

把玩殘篇用力專誰知過眼等雲烟  
於中縱有驚人句

恍在心頭恍目前

一篇黃卷對燈紅博古窮今眼界空  
最苦蠹魚三食字參差疑似訝相同

漁翁

慣倚篷窗望翠微荻楓花畔綠苔磯  
潯陽司馬如相問祇道江頭釣月歸

川上遣興

幾人天府豔勳名我自臨流寫性情  
雨過看潮晴看樹飄飄無待羨公卿

哭羅柱石廣文

撒手人間了夙因  
琴樽從此障黃塵  
流鶯鳴咽花憔悴  
誰向東風再買春

文壇曾拜杏花前  
立雪程門已卅年  
慚愧雲程無寸進  
空將餘晷付詩編

廣文頭角自崢嶸  
回首名場涕淚盈  
掉尾龍門終未化  
孰知池水困鯢鯨

當年羅鄴重人寰  
惆悵錢塘歎運艱  
今日祖孫同一例  
蒼穹何事忌仙班

輓鄔可亭封翁

山斗羣瞻品望隆  
弧南忽訝極星空  
瓊筵昔日公留我  
墓木今朝我哭公  
垂露草頭無復白  
生花蓮舌尙留紅  
芳型宛在瞻靈右  
聊寫詩牋表寸衷

沙頭晤王琴癡  
索余藏帖歸後數月始寄去並附  
以詩

平生信義徧人間  
古帖空勞盼望還  
卻爲道途遼遠甚  
尺書沉滯雁來艱

聞君宮筆近尤精  
珍卉奇禽擅寫生  
一片靈光浮紙上

連居閣吟草卷二  
好同正叔共留名

春日賽會潘蘭坪沿途賦詩是晚賡和二首

滎陽才子聯高會沿路留題任所之知否銀釭深夜後  
有人燈下誦君詩

連行三日不神疲到處相逢亦賦詩一路光風吟不歇  
聲聲繪出太平時

龍山春夜和李萬竹步原韻

已作中流砥柱身風騷猶是詠花人品成金玉羣公重  
氣吐陽和萬物春人已不分真眾母事機無失更加神

鄉團雖小非閒局經理兼資智與仁

種蘭

種蘭曲池畔冉冉自承風愛爾芳馨襲知吾臭味同初  
栽情或淡漸挹意偏融蔭近幽人室根株異棘叢

種菊

種菊東籬下緣貪晚節香世情爭俗豔斯品獨幽芳笑  
口堪迎日清姿不怯霜今朝培植始殷盼到重陽

西園賞荔藻薌詩先成卽次其韻

昔羨陳家紫玉囊而今嘉植遍江鄉無須飛騎常能得

不事撈捕亦可將顛顛肉含丹鳳髓團團人說碧雞裝  
嶺南三百留佳詠坡老詩篇趣味長

秋日從兄露涵邀余同黃白山明經潘壁東劉月  
卿兩茂才家勉齋綉裳集地堂園觴詠得二十

韻

曲徑入園林野花紅滿地疊石掃青苔砌畔善安置樹  
木已成陰栽種十年事林中鳥語喧卽景動詩思況乃  
接詩人所談盡文字東道主情殷慷慨發高義笑道一  
樽開萬事何足累賓主快飛觴交杯傳位次酒酣興倍

豪紛紛各言志高會合一時拚教同一醉八斗酒如泉  
問誰能拔幟戰以酒兵攻莫作三舍避頌以酒德雄莫  
令劉伶刺試看池中魚依然欣鼓翅我輩醉行吟天機  
同暢遂披襟乘清風咳唾生論議落筆興猶酣老去情  
不異回首館仙城忘年交把臂芳訊何時來仍望詩筒  
寄一鏡月侵筵追陪欣附驥

中秋夜對月憶羊城諸友適白山過訪并贈以詩

賦此奉和

千里一明月今宵好泛舟昔聯珠海會同坐畫船遊卅

連居閣吟草 卷二  
載光陰逝難忘往事悠銀河撩我思如隔海天秋忽覺  
詩情起同吟玉斧修銀釭相對夜下榻爲君留

寄懷陳秩卿

詩人歸去各西東回首驪歌悵不窮高適有心懷杜曲  
鄭元終古仰扶風三年爪迹泥痕在一路歌吟海寺中

與秩卿餞行時置酒舟中遊海雲寺

依舊鄉村好風月莫嫌迢遞吝詩筒

重陽日與崔敬坡凌韶階楊三楷家子純暨舍弟

補之策卿藻鄉同酌西園賞菊

西園疊疊黃花開西風飄飄故人來故人賦質皆仙才

篤學凌緯妙化裁夢環楊寶仁術該臨風玉樹譽稱崔  
偕吾昆仲共徘徊唱和園中趁菊杯前者若挽後若推  
排列菊瓊如錢堆敢將佳景付塵埃君不見歲序如箭  
日月催夕陽西下旋顛顛又不見漢家將烈矜雲臺英  
雄轉眼成烟灰豫章大木稱良材厄運難免木之災人  
生行樂貴自恢光陰逝水去莫回今喜六七少長陪聯  
肩撫掌如嬰孩開筵坐花酌金罍恍惚羣仙宴蓬萊籬  
東醉贈意悠哉願祝花神且勿猜

對酒書懷

不管塵根熱惱堆醉鄉遊侶笑言陪愁城萬丈攻能破  
全仗千鈞酒力來

贈別凌韶階

抵掌談心已兩年雪泥鴻爪跡猶鮮徘徊碧草春波地  
記憶紅樓夜月天勉我登場温舊業韶階勸報君隨意  
手殘編狂生浪說詩酬債尙未流風繼古賢余赴科

春遊

春歸何處不繁華老叟尋芳興亦加十里桃花迎曉日  
百枝蓮炬奪晴霞蛾兒鬪火當街豔龍腦騰煙隔巷斜

本街如此風光要行樂頭顱那管白如麻  
賽神

桂曉崧副車授徒余鄉賦呈一律

先生名譽噪羊城廿載蓬茅未識荆愧我功名羅處士  
羨君經學鄭康成登堂羣仰丰規峻掃徑爭呼弟子迎  
貯盼硯田翹秀日春風培養勝躬耕

和陳紫函孝廉見贈韻

讀君詩卷觸詩心滿腹才華羨杜欽此日南歸宏著作  
瑤篇真可作良箴

高談妙語自成文轉戰騷壇陣掃軍如此捷才如此識



新詩脫手總超羣

次從弟翔岐采漁渡頭散步原韻

霓裳新奏曲如仙紅樹溪頭綠水前送過隔塘餘尚繞

聲聲諧婉助詩篇時隔塘地堂園有梨園歌唱

詩畫亭邊夕照幽餘光片片向西流徘徊渡口看花罷

尚訝前山日未收

初秋抱病桂曉崧候書疊至並贈以詩不能答也

病愈乃答之

先生於我關情甚青鳥殷勤問不停恍似阮公神契合

幾番垂注眼常青

苦恨停杯百感傷杜陵多病怯秋霜今朝得遇回春手

橘露流甘味倍長

神思漸爽尚沉沉卧對詩瓢觸寸心疎闊故人情兩地

幾番空比浩然吟

病體分明指掌中程高脈法最靈通陽和願祝遍天下

良相良醫一樣同時患痢疾從弟黎閣治而愈之

崔敬坡解館歸賦贈

著作名高仰伯淵武城風範峻如天况兼兩代情交厚

敬坡尊人于  
東與余舊交  
又得三餘祕法傳杏雨遍壇饒有澤槐風  
拂市又何年東窗文酒西樓月惆悵驪歌意倍牽

楊三楷復客余鄉偶過暢談率成四韻

光風重拂故人家窗傍紅樓冒絳紗泉水更添仙藥井  
針經已耀上官衙三楷曾就貴家聘入署坐醫數年始返清標不遜烟霞  
叟雅致真如臘月花指點垂楊談往事門前依舊綠陰  
斜

聞江南寇平感賦

羣醜猖狂十載中頑雲頻起大江東連年波浪吹難散

今日櫂槍掃欲空天討鯨鯢張角戮軍驅貔虎益州雄  
天河洗甲鏡歌樂總讓平南第一功

采漁園荷花

此荷三月始種咸謂種遲迨七月開花殊繁盛

居然荷沼有靈根種卽愆期放自繁翠柄滿欄紅滿徑  
幾疑亭接抗風軒

玉露盈盈粉欲濡瓣香凹處載如珠昨宵花底團千萬  
爲問曾盛十斛無

瑤織瓊葩豔到天碧紗櫺畔綠池邊亭亭一路都培護  
豈任飄零暮雨前

不借庭樹作飛花輕步凌波傍水涯縱使綠衣遲綻錦  
也隨秋桂發新芽

市橋觀劇卽席對張竹筠作

時秋八月

卅年人喜廟重修士女今朝雜沓遊沿路盡成金粉地  
回欄不斷菊花秋龍涎鼻篆當街轉鳳舸隨風逐水浮  
莫謂垂簾看不見曉妝無數出船頭

暑年幾度往來頻游眺街衢樂最真好好韶華離復合  
依依情景舊翻新絳龍紫鳳千般幻覆鼠籠鷺白戲陳  
恰值廣寒秋正爽霓裳仙管妙如神

回首前遊事已遙者番文酒又招邀烟雲舊夢都陳跡  
題柱新詩欲到橋黃石隱山談老術張昭作賦重名標

何當置酒南居閣頻買輕舟趁晚潮

正南居酒閣在海旁

殷勤秉燭趁秋涼夜踏殘紅屐齒香金粉家家粧盡豔  
魚龍處處興偏長中宵天燦星千點野市燈明字幾行  
恍似畫橋山月下一天簫鼓滿錢塘

看戲

戲場情事縱談空點化愚頑第一功古昔忠良昭若揭  
比看鑑史更玲瓏

臘月送館師凌于遠明經歸家

把袂傷離別送君歸故鄉頻年同聚首今夕索枯腸意  
比陽關感情隨杯酒將驪歌三徑畔相對菊花黃

春日獨居

不知門外事蓬戶自幽居亭繞韶光轉香飄俗氣除丹  
鉛時作侶白髮漸侵予尚有杯中趣開樽酒不虛

黃白山館水門李萬竹家余往訪之談次賦此

桓榮晚遇建殊功卓卓芳型品望隆萬卷經綸儲智府

並懷黃竹

三株桃李藉春風

館內門徒三人

相看彼此年華異交接

詩章氣味同今日故人離復合半窗吟韻雨聲中

和潘壁東見贈韻

角逐名場憶少年舊交情事幻如烟風塵溷我情猶俗  
雪亮如君筆欲仙淹博人皆稱雅士好修自可繼前賢  
功餘兼擅黃岐術良相良醫望着鞭

何菊軒妹婿邀遊潘園偶題四章

存二

名園十畝柳波中滿目烟花閨苑同百尺迴欄全傍水  
千家古帖見高風紅樓閃爍連雲起白塔崢嶸映月融  
最好湖心亭上望麗人聯襪水西東

花欄簇簇鳥聲喧疑入桃源別有村翠影遠連荷畔水  
紅塵不到樹邊門頻生幽趣供詩料無限奇花撲酒樽  
贏得遠離城市外林泉高卧脫囂煩

答白山

來書有勸  
余赴科語

文章疎去料難工逸興頻添頗自雄詩酒昔曾聯夜月  
烟霞今已混樵翁嵇生性懶仍依舊謝守風流豈便同  
手把牟尼珠自數支持惟願小安豐

過新造墟海旁與家當平暢談往事歌以誌之

境遇窮人心欲碎開編幸與古人對白蘋溪畔白鷗邊

況復坐看潮長退人生會合亦有時相逢握手慰遐思  
細談今事與往事不覺爾我殊鬚眉昔日文場共年少  
策足直欲登廊廟幾番重說舊留題更欲新吟雜歌嘯  
君自出門我閉門一動一靜各神存陶朱事業陶潛詠  
都與澄川悟本原餘閒檢取琅函讀長篇短篇皆往復  
腰纏十萬貫中人孰知君果便便腹感君爲我勸加餐  
世事浮雲付達觀恰好溪頭樂長飲一醉陶然天地寬

秋江雨後

寒雨聲初歇餘曛照亦明綺霞紅有彩練水白如晶清

景留真趣流光觸舊情江雲應笑我詩思老猶縈

移居

徙向千竿竹畔居杜陵老屋好藏書一窩風月饒真趣  
斗室乾坤樂自如荷涇綠衣添露潤花薰瓊笈覺香舒  
澄心領畧家風味芥紫菘青小雨餘

聞白山主岡尾書院賦寄

萬籤翻遍鄴侯書想是前身月裏居九薦棘闈仍未售  
江湖魏闕意何如

勝概當年說舊酤園邊邀月共提壺而今十八名鄉主  
尚記花間酌酒無

久仰紆徐兼卓犖又聞流麗雜端莊談經多少才華士  
都讓君登翰墨場

豹畧龍韜蘊蓄精胸中兵甲出儒生軍門此日牙旗靜  
甲洗天河不用兵

過蓼水遇蔣霜漁

少戰童軍我亦然憐君窗雪困華年他時蔣灝如梁灝  
射策金門獨占先

文章經術自功深望重儒林世共欽莫謂晚成非大器

雲中原有老龍吟

村行探梅歸贈家器之茂才

日斜村外行拂拂暗香逐乍覺映疎籬却嫌遮半屋行

看爛漫開占此清幽獨折枝聊贈君感君多化育器之是年

授兒姪輩讀書家塾

四弟策卿歿因憶去年哭五弟藻薈詩有云折斷

雁行年最少不堪回首聚西園今復邁是變痛

何如也率成一章哭之

手足難分永別時西風惆悵淚如絲可憐荆樹頻摧朽

豈復茶甌共賦詩情有千般何處訴病無十日不勝悲

庭前且幸三槐植或盼成陰傍鳳池兩弟俱生三子

連年摧折紫荆枝感動神傷力不支變故疊遭情倍苦

輓歌重唱句彌悲塘飄春草難成夢殯滯先人尙待時

先祖考妣考妣均尙在殯何日白楊花遍覆免教同氣費憂思時與三弟

補之商葬地事

示諸姪

馬敦游鉅下文淵貽以書箴規期倍切今我亦情如

采漁別墅與從弟鳳樓談園中花木不禁有今昔

之感因示諸子姪

庭前猶記百花叢太息梢頭日漸童剩有數枝香亦淡  
似難千葉綠兼紅詎因老去栽培少都爲人來削伐空  
願得萌芽依舊好咸沾雨露樂春融

病中作

邇來榮衛少調和心緒無聊奈病何反已自思無愧怍  
燈前聊學啟期歌

與劉文園夜話

昔日戰文場出陣屢前列三條燭已灰一把芹未擷他

技習黃岐精心辨寒熱堪侔良相功早羨肱三折

文園知醫

遣懷

炎涼人世事全刪猶恐塵牽念不閒最愛竹枝能解意  
搖搖招我綠雲間

閒過歲月祇陶然事事尋常劇可憐幸借蓮臺方鏡澈  
靈犀一點在心田

贈品上人

慈雲普蔭露華施兩地神交日繫思知我龍華遵舊約  
霞杯玉醴早相期



詩步唐音字做顏開門時接白雲還若非貝葉經筵晤  
豈識如來在世間

偶吟

福慧由來少兩全難將此理問青天前生已乞空王允  
願蘊才華得永年

過家崧生館

筆耨書鋤日未休誰知片石急難周束脩至薄行看盡  
好展經綸借箸籌

睡起

養到神圓夢亦圓縱然夢醒復安眠最妨俗事胸懷繫  
未打晨鐘醒已先

做裘

冬夜披猶在蒙茸異舊觀禦風雙袖怯對雪五更寒毛  
去雖無色皮存尙覺完有懷垂釣者底事重嚴灘

雪夜吟

禦雪縱遭裘做終宵無事欬歔試與牛衣榻上相將比  
較何如

侵不入翠雲裘霏不到芙蓉帳惟憐負擔中人五夜奔

馳路上

連居閣吟草卷二終

連居閣吟草

溫河市 函 館